

AKASHVANI AIZAWL

REGIONAL NEWS UNIT

REGIONAL NEWS BULLETIN

RICE DISTRIBUTION

Pangbalkawn Community Hall-ah nimin khan Pangbalkawn khua a chhungkaw 47 te hnenah Buhfai bag khat theuh semna hun hman a ni a, he hun hi Kolasib Bialtu, Deputy Speaker Pu Lalfamkima chuan khuallian niin a hmanpui.

Deputy Speaker chuan he hunah hian kuthnathawktute tan sorkar a ding zel dawn niin a sawi a, hun reilo te, kumkhat chuang hlek chhungin ZPM sorkar chuan sawhthing leh hmuhphiah te a lei a, lei zel a tum bawk a ni a ti. Chu tih rual chuan vawi lehkhatah sawrkar hmalakna zawng zawng chu a fel duak duak thei lova, chuti chung chuan sorkar hmalakna erawh chak taka kalpui mek zel a ni a ti bawk. Pu Lalfamkima chuan sorkar in a hnathawh rah te chu a lo thlawn in a ral dawn lova, kuthnathawktute tan sorkar chuan theihtawpin a bei zel dawn a ni, a ti a. Universal Health Care scheme chungchang pawh sawiin, chak taka kalpui a ni a, mipui te chu he health care scheme ah hian in ziak lut vek turin a ngen nghal bawk a ni.

Nimina Deputy Speaker in hun a hmanna-ah hian Pangbalkawn a chhungkaw thahnem tak an tel niin sorkar thuchhuah chuan a tarlang a ni.



UNION SECRETARY

Ministry of Skill Development and Entrepreneurship (MSDE) Secretary, Pu Atul Kumar Tiwari chu Mizoramah a cham mek a, nimin Inrinni khan Aizawl a lo thlen ve leh Government Aizawl ITI a tlawh nghal.

Pu Tiwari hian ITI hmunhma leh hmasawna ruhrel dinhmunte a en a, zirlaite nen pawh inkawmin ITI hmasawna atana an lo thlen hrang hrangte chu ngai pawimawhin a tul anga hmalakna kalpui a nih theih nan RDSDE Regional Director Pu BK Singha chu lo bawhzui nghal turin a hriattir a ni. Mizoram a lo thlen hian Labour, employment, skill development & entrepreneurship (LESDE) secretary Pu Lalmalsawma Pachuau leh director Pu John Tanpuia bakah department officer ten an lo dawngsawng a. Pu BK Singha leh IIE director Pu Ishwar Poojar-te'n Pu Tiwari hi an tawiawm bawk a ni.

Pu Tiwari hi Mizoram a cham chhungin NIT Mizoram te, NIELIT Mizoramte bakah PMKVY hnuai Skill Training Centre te tlawh a tum a, Thenzawla Mizote puantah hmanga eizawna kawnga hma kan lak mekna Handloom Centre te tlawh tumin ruahmanna a siam bawk a ni.

Pu Tiwari hian a cham chhungin Labour, Employment, Skill Development & Entrepreneurship (LESDE) Department thawktute nen Mizorama kutthemthiamna

leh mahni kutkawiha eizawnna lama hmasawnna tur hrang hrang leh thalaite tana hmasawnna tur hmachhawp tam tak LESDE Minister Pu Lalnghinglova Hmar te nen sawiho an tum bawk a ni. Naktuk May 12 Thawhtanni hian Mizoram chhuahsanin Delhi lam a pan leh nghal dawn a ni.



NQAS

Bilkhawthlir Primary Health Centre (PHC)-in sorkar damdawi-in thawk thate tana a pek thin National Quality Assurance Standard (NQAS) National Certification a dawn lawmna Bilkhawthlir PHC Conference Hall-ah nimin khan huaihawt a ni.

He hunah hian Kolasib district Sr. Chief Medical Officer Dr. RK Lalthlamuana chu khuallian niin Bilkhawthlir BDO Pu Samuel Lalmalsawma Sailo chu khualzahawm a ni a.

Dr.RK Lalthlamuana chuan Bilkhawthlir chu a post hmasa ber a nih thu sawiin, chutihlai chuan dawhkan mumal pawh a awm lova, tunah erawh chuan nasa takin hma a sawn chho a, Mizoram mai pawh nilo, NQAS National Certified hial an ni thei ta chu lawmawm a tih thu sawiin, thawktute leh khawtlang tanrualna vang liau liau a ni a ti. Kolasib district-ah PHC 5 a awm mek tih sawiin national level certified turin 70 hmuh kai a ngaih laiin Bilkhawthlir PHC in 90 chuang zet an hmu chu lawmawm a tih thu a sawi bawk. Hma sawn chho lehzel turin hmabak an la nei tih hriaa tan an lak chhoh zel a pawimawh thu a sawi bawk.

National Health Systems Resource Centre (NHSRC)-in tehfung an duan hmangin India ram pumah damdawi-in endikna hna a kalpui thin a. NHSRC endikna kal zelah Bilkhawthlir PHC hian kumin March ni 28 leh 29 khan National Level NQAS Assessment a hmachhawm a. He tah hian ram pum huap endiktu challeng tak tak Dr. Asish Kumar Gosh leh Dr. Isha Sachdeva te’n endikin an lungawi hle a. He an endikna result hi April ni 11 khan tih chhuah niin Result atang hian Bilkhawthlir PHC chuan Kolasib District chhunga National Quality Certified hmasa ber ni turin za zela 94 point 95 a hmu a. Hei hi Mizoram chhunga PHC Level-ah chuan hmu sang ber a la ni rih. Tun dinhmunah Mizoram chhungah NQAS National Certification nei hi damdawi in 16 a awm mek a, PHC 9, District Hospital 5 leh Urban PHC 2 te an ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



LOK ADALAT

Serchhip District Legal Services Authority chuan nimin khan Serchhip District Court-ah National Lok Adalat a buatsaih a, cheng nuai 13 leh sang 3 hu thubuai chin fel a ni.

Lok Adalat hi mipuite tan awlsam leh rang zawk, sum leh pai sen ngai lova thubuai ngaihtuahna leh inremna neihpui thinna a ni a. National Lok Adalat thukhawm hi Pi Josangzeli Tlau, MJS-in kaihruaiin Conciliators vantlang tana thawktu Pu RL. Chhuanawma leh ukil Pu Lalrinhlua te'n an tawiawm bawk a. He tah hian Serchhip District chhung atanga thubuai chi hrang hrang 56 lut zinga thubuai 19 chin fel a ni a ni. Serchhip District Legal Services Authority hian a khat tawkin Lok Adalat a huaihawt thin a, a tul dan azirin Serchhip District chhunga khaw thlan bikah Mobile Lok Adalat pawh a buatsaih thin bawk a ni.

